



CONVENIO DE COLABORACIÓN ENTRE A CONSELLERÍA DE INFRAESTRUTURAS E MOBILIDADE E ABANCA CORPORACIÓN BANCARIA, S.A. PARA A APLICACIÓN DE BONIFICACIÓNS NO PREZO DAS TARXETA DA MOBILIDADE DE GALICIA, TMG, E A DIFUSIÓN DO LANZAMENTO DA TARIFA +65

REUNIDOS:

Dunha parte, Don Ignacio Maestro Saavedra, director xeral de Mobilidade da Consellería de Infraestruturas e Mobilidade, en representación da dita consellería por delegación de sinatura da conselleira, feita por Orde do 7 de setembro de 2017.

D. Jorge Martínez Martínez, con NIF nº 36070987H e D. José Lino Comesaña Calvo, con NIF nº 36041545Q, en nome e representación da entidade ABANCA CORPORACIÓN BANCARIA, S.A. (no sucesivo, ABANCA), en virtude do establecido nas copias das escrituras de solemnización de acordos e apoderamento, outorgadas ante os notarios Francisco Manuel Ordoñez Armán e José Piñeiro Prieto, respectivamente.

As partes recoñécense competencia no concepto no que respectivamente interveñen e con capacidade legal para formalizar o presente convenio de colaboración, e para ese efecto

EXPOÑEN:

O transporte público colectivo de persoas non só se configura como servizo público de carácter esencial para a poboación, senón que tamén contribúe á redución da contaminación e da conxestión das nosas cidades e, por tanto, ao incremento da calidade de vida do conxunto da poboación.

Coa finalidade de contribuír ao impulso do sistema de transporte público colectivo, un dos eixes de actuación prioritarios é o abaratamento do custo por viaxe ás persoas usuarias e o establecemento de sistemas de información e pagamento que contribúan á promoción da súa utilización recorrente, para o que a Xunta de Galicia, xunto inicialmente cos concellos participantes no Plan de transporte metropolitano de Galicia, impulsou o desenvolvemento e implantación dunha tarxeta moedeiro sen contactos para a súa utilización no sistema de transporte público, a TMG.





Para o impulso desta actuación, a entón Consellería de Política Territorial, Obras Públicas e Transportes e a entidade, tamén entón, Caixa Galicia, formalizaron o 10 de abril de 2008 un convenio de colaboración para a mellora do sistema de pagamentos do transporte metropolitano de Galicia. No marco deste convenio de colaboración, as partes implantaron a tarxeta moedeiro sen contactos TMG, que veu substituír ás tarxetas con contactos que foran emitidas previamente nun marco de colaboración análogo impulsado entre ambas partes.

E con este mesmo obxectivo de impulsar a utilización do transporte público, de xeito singular entre a mocidade, a Xunta de Galicia procedeu á implantación da tarifa Xente Nova, e da Tarxeta TMG Xente Nova como instrumento para a súa xestión, para o que o 3 de agosto de 2016, a entón Consellería de Infraestruturas e Vivenda e ABANCA subscribiron un convenio de colaboración que tiña por obxecto establecer as bases de colaboración para a aplicación de bonificacións ás persoas con idades comprendidas entre os 4 anos e os 18 anos de idade, inclusive, no eido do Plan de Transporte Metropolitano de Galicia.

Con posterioridade, a Orde do 18 de decembro de 2019 pola que se regula a tarifa específica Xente Nova no transporte público interurbano da competencia da Xunta de Galicia, da Consellería de Infraestruturas e Mobilidade, publicada no DOG nº 248, do 31 de decembro de 2019, ampliou o ámbito de idade das persoas beneficiarias ata os 20 anos incluídos e, ademais, preveu a expansión territorial da tarifa Xente Nova mediante unha planificación programada das sucesivas ampliacións do seu ámbito territorial de aplicación ata abranger a totalidade da Comunidade Autónoma, procedemento que, superadas os principais efectos do COVID-19, culminaría no mes de maio de 2021. Ademais, esta ampliación territorial do ámbito de aplicación resultaba, por outra parte, coherente coa ampliación igualmente a todos os servizos públicos de transporte de Galicia da posibilidade de utilización da denominada Tarxeta da Mobilidade de Galicia, TMG.

Actualmente, a Consellería de Infraestruturas e Mobilidade está a promover a implantación dunha nova tarifa específica, a *Tarifa +65*, dirixida a facilitar ás persoas maiores de 65 a posibilidade de realizar ata 60 viaxes mensuais gratuítas nos servizos públicos de transporte da competencia da Xunta de Galicia, para o que está a tramitar un proxecto de orde pola que se regula a dita tarifa. Este proxecto, que prevé a implantación da tarifa o 1 de xaneiro de 2024, establece para a súa utilización a necesidade de dispoñer dunha



tarxeta TMG, ao ser este o instrumento empregado para a súa aplicación material.

Establecida unha liña de colaboración dirixida á aplicación das Tarxetas da Mobilidade de Galicia (TMG e TMG Xente Nova) mediante o convenio formalizado o 8 de novembro de 2022 entre as Consellería de Infraestruturas e Mobilidade e a entidade ABANCA Corporación Bancaria, S.A., o principal obxectivo que se persegue coa sinatura deste novo Convenio é o mantemento do prezo bonificado das tarxetas TMG, fixado en 2 euros no dito convenio, coa adquisición dunha nova remesa das mesmas precisa para garantir a súa dispoñibilidade para o público en xeral, así como incidir na dita liña de colaboración cara facilitar a implantación da nova tarifa específica +65, que está a promover a Xunta de Galicia.

A Comunidade Autónoma de Galicia é competente en materia de transportes terrestres que se desenvolvan integramente dentro do seu territorio, de acordo co establecido no artigo 148.5 da Constitución Española e do artigo 27.8 do Estatuto de Autonomía de Galicia. O Decreto 26/2019, do 7 de marzo, polo que se establece a estrutura orgánica da Consellería de Infraestruturas e Mobilidade, órgano da administración autonómica ao que corresponden as competencias e funcións en materia de transportes, determina que a Dirección Xeral de Mobilidade terá, entre outras, as funcións relativas á implantación de plans de fomento do transporte público. O artigo 82.4 da Lei 2/2017, do 8 de febreiro, de medidas fiscais, administrativas e de ordenación prevé a posibilidade de que poida establecerse e xestionarse no marco do sistema de transporte público bonificacións adicionais promovidas pola propia administración titular do servizo na prestación do servizo ao colectivo ao que dirixan a súa actuación.

ABANCA é unha entidade xurdida en setembro de 2011 (inicialmente co nome de NCG Banco, S.A.) como froito da segregación do negocio bancario de Novacaixagalicia, entidade que á súa vez nacera en decembro de 2010 da fusión entre Caixanova e Caixa Galicia. Deste xeito, ABANCA configúrase como a sucesora da actividade desta última, e subrógase na posición dela nas relacións xurídicas que establecece.

Trátase da única entidade bancaria que manifestou o seu interese por adaptarse ás condicións esixidas para o funcionamento da TMG e TMG Xente Nova, se ben a posibilidade de participación por parte doutras entidades bancarias que o desexen segue aberta.





De conformidade co exposto, é vontade das partes relacionadas no encabezamento proceder á execución dunha serie de actuacións conxuntas e desenvolvementos tecnolóxicos que permitan o mantemento e consolidación da aplicación das bonificacións tarifarias no transporte público colectivo respecto da TMG e da TMG Xente Nova (persoas con idades comprendidas entre os 4 e os 20 anos inclusive), polo que

ACORDAN

Asinar este documento, e obrigarse reciprocamente ao seu cumprimento, de conformidade coas seguintes,

CLÁUSULAS

Primeira.- Obxecto e ámbito de aplicación

O presente acordo ten por obxecto:

- a) Garantir a dispoñibilidade por parte de ABANCA de tarxetas TMG para a súa comercialización a prezos bonificados.
- b) Programar a realización de actuacións dirixidas a fomentar a utilización do sistema de transporte público no grupo de persoas que se beneficiarán da tarifa +65, facilitando o seu coñecemento.

Segunda.- Condicións relativas á adquisición das Tarxetas da Mobilidade de Galicia (TMG) e TMG Xente Nova (TMGXN)

1.- Mediante a formalización do presente convenio de colaboración, a entidade ABANCA comprométese a poñer ao dispor das persoas usuarias un conxunto de **50.000 novas tarxetas TMG**, para a súa distribución aos prezos bonificados que se indican no parágrafo seguinte, adicionais ás que foron bonificadas con base en anteriores convenios de colaboración formalizados coa Xunta de Galicia.

Agás acordo noutro sentido por parte da Comisión de Seguimento do presente convenio logo da tramitación contable que, se fose o caso, resultase precisa, as ditas tarxetas TMG serán subministradas ás persoas usuarias ao prezo bonificado, de 2 euros.

As partes acordan que, para os efectos da aplicación da compensación que se prevé neste apartado, considérase un prezo máximo de adquisición **3,412 € por TMG**, asumindo a Consellería de Infraestruturas e Mobilidade a obriga





de abonar a ABANCA a diferenza entre o custo final de adquisición que tivesen as correspondentes tarxetas, que soportase ABANCA, e o prezo de subministración establecido, **cun importe máximo, en todo caso, de 70.600 €.**

2.- As contías asumidas pola Consellería de Infraestruturas e Mobilidade aboaranse no exercicio 2023 con cargo á aplicación orzamentaria 2023.09.02.512A.470.1, para o que ABANCA deberá certificar e xustificar contablemente a dispoñibilidade das referidas tarxetas para a súa expedición ás persoas usuarias, así como o prezo finalmente aboado por elas. O importe que se abonará pola Dirección Xeral de Mobilidade, logo da presentación da anterior xustificación por parte de ABANCA, será o resultante de aplicar ao prezo de adquisición, co límite do prezo máximo antes indicado, o prezo bonificado de distribución que corresponda a cada tipo de tarxeta.

Para tales efectos, a xustificación da correspondente dispoñibilidade e prezo de adquisición a realizar por ABANCA deberá ter entrada na Dirección Xeral de Mobilidade non máis tarde do 18 de decembro de 2023, renunciando ABANCA a calquera compensación derivada da súa adquisición e posta a disposición para a súa comercialización nos referidos importes bonificados no caso de non aportar a dita xustificación no referido prazo.

Terceira.- Colaboración para a implantación da tarifa +65

1. As partes asinantes acordan establecer unha liña de colaboración dirixida a impulsar conxuntamente a implantación da Tarifa específica +65 e, de xeito singular, á súa difusión entre as persoas destinatarias da mesma.

Para tal fin, ABANCA comprométese a desenvolver no ano 2023 unha liña de difusión da dita tarifa +65, que abarcará:

- elaboración dunha comunicación postal ás persoas maiores de 65 anos que consonte cos seus ficheiros sexan titulares dunha TMG que estivese operativa no período anual anterior ao 1 de outubro de 2023.
- elaboración de información dirixida ás súas oficinas comercializadoras de tarxetas TMG ou TMG Xente Nova, coa finalidade de facilitar as funcións de información e resolución de dúbidas por parte do seu persoal a aquelas persoas maiores de 65 anos interesadas titulares de tarxetas TMG, ou interesadas na aplicación da tarifa +65; isto consonte coa información que a Xunta de Galicia comparta con ABANCA respecto da dita tarifa.





A comunicación postal será preparada por ABANCA e incluírá a remisión dun mínimo de 53.000 cartas, seguindo o modelo que para tal efecto lle facilitará a Xunta de Galicia. ABANCA asumirá a totalidade de tarefas vinculadas coa impresión, ensobrado e personalización, así como a súa entrega na oficina de Correos que indique a Dirección Xeral de Mobilidade para a súa remisión por parte desta; dentro das ditas tarefas inclúese a dotación papel de carta en formato A-4 de 90 gr, e a súa impresión a 1/1 t, así como sobres de 90 gr, de 115x225 de tamaño, e impresos a 1/1 t.

Para a execución desta actuación, a Consellería de Infraestruturas e Mobilidade comprométese a realizar unha achega de ata 12.920 euros para a remisión de ata 53.000 cartas, que ascenderá a ata 13.380 euros de acadar as 55.000 cartas, e a ata 15.750 euros de ascender as cartas remitidas a 65.000.

2. Os importes correspondentes aos desenvolvementos que se prevén nesta cláusula, que teñen o carácter de máximos, serán abonados por parte da Consellería de Infraestruturas e Mobilidade logo do depósito das comunicacións en Correos preparadas para a súa remisión, e a certificación por parte de ABANCA da súa completa realización e da xustificación do correspondente gasto, incluído, no seu caso, o gasto no que se incorrera con medios propios, certificación e xustificación que terá que ser remitida á Dirección Xeral de Mobilidade non máis tarde do 26 de decembro de 2023.

Cuarta.- Outras obrigas asumidas por ABANCA relacionadas coa tarifa +65

1.- ABANCA comprométese a manter a totalidade de funcionalidades e compromisos asumidos nos convenios formalizados previamente coa Consellería de Infraestruturas e Mobilidade.

2. Respecto da nova Tarifa +65, ABANCA comprométese a remitir á Xunta de Galicia, antes do 15 de decembro de 2023, a relación completa de tarxetas TMG expedidas nas súas oficinas, identificando para cada tarxeta o nome, primeiro apelido, segundo apelido, NIF, data de nacemento, e concello do domicilio da persoa titular da dita tarxeta. A partir de ese momento, ABANCA informará a la Xunta de Galicia, diariamente, das altas, baixas ou substitucións destas tarxetas. Esta información será transferida á aplicación Social da Xunta de Galicia.

3.- ABANCA remitirá a información que identifique todos os reintegros realizados ás tarxetas TMG que permita identificar o seu estado (pendente,



caducada, cobrada), consonte coa sistemática e procedemento seguido para a TMG Xente Nova.

4.- ABANCA deberá poñer a disposición das persoas titulares das TMG +65 os reintegros remitidos pola Administración os días 5 e 20 de cada mes natural.

Quinta.- Obrigas asumidas pola Consellería de Infraestruturas e Mobilidade

Ademais das obrigas indicadas nas cláusulas segunda e terceira respecto das compensacións pola bonificación no prezo de distribución das tarxetas TMG previstas neste convenio, e a colaboración nas actuacións de información da Tarifa +65, a partir da súa vixencia e como bonificacións establecidas no eido dos contratos de concesión de servizos públicos de transporte regular de viaxeiros de uso xeral, a Consellería de Infraestruturas e Mobilidade, a través da Dirección Xeral de Mobilidade, tramitará os abonos dos importes correspondentes aos reintegros para materializar a tarifa aplicable ao colectivo +65, e remitirá os ficheiros ou remesas correspondentes aos mesmos a ABANCA para a súa posta a disposición das persoas titulares da TMG que accedan á dita tarifa específica +65.

Estas actuacións serán materializadas consonte co que previsto no convenio formalizado o 8 de novembro de 2022 entre a Consellería de Infraestruturas e Mobilidade e ABANCA.

Sexta.- Crédito e aplicación orzamentaria

As obrigas económicas establecidas con base neste Convenio acadan o importe máximo de **86.350 euros** que serán financiadas con cargo á aplicación orzamentaria 09.02.512A.470.1 da Xunta de Galicia no exercicio 2023.

Sétima.- Deber de confidencialidade e tratamento de datos

1. Cada unha das partes comprométese a cumprir, no ámbito de execución do presente Convenio, coas obrigas e deberes que respectivamente lles correspondan, de conformidade co disposto no Regulamento (UE) 2016/679 do Parlamento Europeo e do Consello do 27 de abril de 2016, relativo á protección das persoas físicas no que respecta ao tratamento de datos persoais e á libre circulación destes datos (en diante, "RXP"), así coma na Lei Orgánica 3/2018, do 5 de decembro, de protección de datos persoais e garantía dos dereitos dixitais (en diante, "LOPDXDD") e en calquera normas





aplicables ou que no futuro poidan promulgarse en desenvolvemento da anterior.

2. En todo o referente á protección de datos persoais e deber de confidencialidade resultarán de aplicación as cláusulas previstas no convenio formalizado entre as mesmas partes o 8 de novembro de 2022.

Os datos persoais dos asinantes e/ou representantes que subscriben o presente Convenio en nome e representación de cada parte, serán tratados coa finalidade de xestionar e executar o presente Convenio. A base xurídica para o tratamento de tales datos atópase no interese lexítimo das Partes en garantir o correcto desenvolvemento e execución da relación contractual.

Os referidos datos persoais conservaranse durante a vixencia do Contrato e posteriormente, sempre que non se exercite o dereito de supresión, durante os prazos legais que resulten de aplicación. En concreto os datos persoais que sirvan como xustificante da relación contractual establecida e/ou do cumprimento de obrigas legais derivadas da mesma, serán conservados, debidamente bloqueados, durante os prazos de conservación que imponha a normativa aplicable, así como durante os prazos de prescrición das accións civís, penais, administrativas ou de calquera outro tipo que puidesen derivarse da relación contractual.

Os titulares dos datos poderán exercer os dereitos de acceso, rectificación, supresión, oposición, limitación do tratamento e portabilidade mediante petición escrita:

- Respecto de ABANCA, a través do enderezo electrónico: privacidad.proveedores@abanca.com
- Respecto da Consellería de Infraestruturas e Mobilidade da Xunta de Galicia, a través da sede electrónica da Xunta de Galicia ou presencialmente nos lugares e rexistros establecidos na normativa reguladora do procedemento administrativo común, segundo se establece na información adicional recollida en <https://www.xunta.gal/informacion-xeral-proteccion-datos>

Así mesmo, os interesados poderán dirixir as súas reclamacións derivadas do tratamento dos seus datos á Axencia Española de Protección de Datos (www.aepd.es) no caso de considerar vulnerados os seus dereitos.

3. Respecto da colaboración que se regula na cláusula terceira deste convenio e, de xeito singular, respecto da elaboración dunha comunicación postal ás persoas maiores de sesenta e cinco anos titulares de TMG, as





partes recoñecen e aceptan que, as partes actuarán como corresponsables do tratamento, consonte co establecido no artigo 26 do RXPd, ao teren sido determinados conxuntamente polas partes os obxectivos e os medios esenciais da indicada operación de tratamento dos datos persoais.

No ámbito de dita corresponsabilidade do tratamento, as respectivas responsabilidades das partes no cumprimento das obrigas impostas polo RXPd, establécense de mutuo acordo:

- a. Corresponde á Consellería de Infraestruturas e Mobilidade a definición dos parámetros para a identificación dos Titulares da TMG que serán os destinatarios da comunicación, que se efectuará consonte co que establece o artigo 6.1.b) do RXPd, isto é, a adecuada execución do servizo de transporte público da Xunta de Galicia e, por conseguinte, tamén a adecuada execución do contrato para a adquisición e utilización da tarxeta da mobilidade de Galicia, como medio de pagamento, emitida por ABANCA no marco da colaboración coa Xunta de Galicia, contrato que os Titulares teñen subscrito con ABANCA.

A indicada comunicación axustarase ao formato e contido que indicará a consellería.

- b. Pola súa parte, ABANCA poderá encargarse a impresión, ensobrado e entrega en Correos da comunicación ao seu provedor de servizos Abanca Gestión Operativa, S.A. (A-15126923), asumindo o compromiso de, para tal fin, incluír a cláusula de encargo do tratamento dos datos persoais, consonte ao establecido no artigo 28 do RXPd, no contrato de prestación de servizos que teña subscrito ou subscriba con Abanca Gestión Operativa para regular o acceso por dito provedor aos datos persoais, consonte co seguinte:
 - Coa finalidade de que o referido provedor poida levar a cabo os servizos de impresión, ensobrado e entrega en Correos das comunicacións, ABANCA proporcionaralle os datos identificativos e de contacto dos seus destinatarios, así como os catro últimos díxitos da última TMG adquirida por aqueles, TMG que se terá en conta para o acceso polo seu titular á tarifa +65.
 - Utilizar, aos efectos da impresión, ensobrado e entrega en Correos das cartas, os últimos datos identificativos e de contacto que os destinatarios lle facilitaran a ABANCA, tal e como ditos datos estean rexistrados nos seus sistemas.





Así mesmo, ABANCA atenderá o exercicio dos dereitos de acceso, rectificación, supresión, oposición, portabilidade e limitación do tratamento dos datos que os destinatarios poidan exercitar en relación coa operación de tratamento dos seus datos que comporta o envío das comunicacións, sen prexuízo de que os destinatarios poidan exercitar ditos dereitos fronte a cada unha das partes na súa condición de responsables do tratamento dos datos.

De igual modo, corresponde a ABANCA ter informado aos destinatarios, nos contratos para a adquisición e utilización da TMG (como medio de pago) emitida por ABANCA en colaboración da Xunta de Galicia, de que: (i) os seus datos de carácter persoal serán tratados coa finalidade de manter, desenvolver e controlar a relación derivada dos devanditos contratos; e (ii) das direccións nas que poderán exercitar os dereitos anteriormente referidos.

As partes porán a disposición dos destinatarios das comunicacións que o soliciten os aspectos esenciais do presente acordo de corresponsabilidade.

Oitava.- Comisión de Seguimento

Establécese unha comisión mixta de seguimento deste convenio, á que serán sometidas as cuestións que expresamente se prevén no mesmo así como aquelas outras que deriven do desenvolvemento deste acordo aínda que non estean expresamente recollidas nel, así como aquelas que impliquen desconformidade por algunha das partes asinantes.

Esta comisión está composta por:

- Pola Consellería de Infraestruturas e Mobilidade, o director xeral de Mobilidade ou a persoa en quen delegue, que a preside.
- Por ABANCA, o Director de Medios de Pago, ou persoa en quen delegue.
- Actuará como secretario ou secretaria unha ou un funcionario da Dirección Xeral de Mobilidade.

Novena.- Natureza xurídica e normativa aplicable

Este convenio atópase incluído dentro dos previstos no artigo 6.2 da Lei 9/2017, de 8 de novembro de 2017, de contratos do sector público, polo que queda fóra do ámbito de aplicación desta lei. Non obstante, aplicaranse os principios desta norma para resolver as dúbidas ou lagoas que puidesen presentarse.





Este convenio rexeráse polas súas cláusulas e pola Lei 40/2015, do 1 de outubro, de réxime xurídico do sector público, así como polas disposicións que en materia de convenios se recollen na Lei 1/2016, do 18 de xaneiro, de transparencia e bo goberno da Xunta de Galicia.

Décima.- Transparencia e publicidade

Este convenio será obxecto de publicación nos termos do artigo 15 da Lei 1/2016, do 18 de xaneiro, de transparencia e bo goberno e demais normativa aplicable, e as partes manifestan o seu consentimento para que os datos persoais que consten no convenio, e mailo resto das especificacións contidas neste, poidan ser publicadas no Portal de Transparencia e Goberno Aberto.

Undécima.- Entrada en vigor e vixencia

O presente convenio entrará en vigor o mesmo día da súa sinatura, e manterá a súa vixencia ata o 31 de decembro de 2023.

Sen prexuízo do anterior, as partes manterán máis alá desa data as obrigas relacionadas coa xestión da tarifa +65, tales como a remisión recíproca de información ou a tramitación de reintegros ás persoas beneficiarias, obrigas e actuacións ás que lles resulta de aplicación as previsións do convenio formalizado polas mesmas partes o 8 de novembro de 2022.

Non obstante o anterior, a vixencia das previsións referentes ás xestións vinculadas coa Tarifa +65 diferentes aos traballos de difusión que se prevén na cláusula terceira, estarán condicionadas á efectiva entrada en vigor e mantemento desta tarifa específica por parte da Xunta de Galicia; no suposto de que, finalmente, a dita tarifa non se chegase a implantar, ABANCA terá dereito ao aboamento dos importes previstos na dita cláusula terceira que efectivamente executase e xustifique consonte co previsto neste convenio.

E para que conste, e en proba de conformidade, os comparecentes asinan o presente convenio no lugar e data indicados no encabezamento.

A conselleira de Infraestruturas e
Mobilidade

(P.D. de sinatura, Orde do 07/09/2017)

O director xeral de Mobilidade
Ignacio Maestro Saavedra

Por ABANCA CORPORACIÓN
BANCARIA, S.A

Jorge Martínez Martínez

José Lino Comesaña Calvo

(Documento asinado dixitalmente)

